

Biblioteca Lumnezia

Igl onn vargau ei stau per la biblioteca Lumnezia igl onn dalla gronda midada. Suenter in liung temps da spetga, far plans, puspei haver pazienza eis ei lu l'entschatta dalla primavera stau aschi lunsch. Las lavurs en las localitads dil Volg vegl a Palius han entschiet. Ussa havein nus saviu planisar concret la bardigliada per la stad. Il davos da fenadur havein lu serrau la pintga „ herziga“ biblioteca en las localitads dalla casa da scola a Vella. Duront sis jamnas havein nus pachetau chista per chista per chista, tut senza gronda canera e bein organisau han Margreta, Barbara ed jeu svidau la biblioteca veglia ed endrizzau la nova. Sulettamein per il transport dad in liug a l'auter havein giu agid dils luvrers da vischnaunca.

Cun plascher e naturalmein loschas havein aviart gliendisgis ils 16 da settember nossas localitads novas. La biblioteca ei ussa amiez il vitg da Vella en in grondius plaz. L'entira jamna ei stau portas aviartas. Avon e suentermiezgi havein beneventau nossa clientella regulara sco aunc bia auters interessai ni marviglius. Mintga gi havein offeriu tarschola frestga cun caffè e te. La populaziun Lumneziana sco era hosps han demussau grond interess. Il local empau special che nus havein astgau realisar ensemen cun la vischnaunca Lumnezia ed igl architect indigen Gion Caminada, sco era nossa purschida han perschadiu ed ingantau nossas visitadras e visitaders.

Per nus ei l'jamna d'avertura era stada in test. Ei tut sco nus havevan mess avon?? Nies facit, grondius! Ei dad mo pintgas caussas che ston vegnir megliuradas. Nus havein ussa in bien ton dapli ch'il dubel plaz, dasperas aunc ina stanza da material e perfin ina cuschina pintga sauda ussa a nus.

Top, semplamein cool ni aunc meglier mega cool nossa nova biblioteca.

In grond engraziament alla vischnaunca Lumnezia.

Engraziel era fetg a Margreta e Barbara che han prestau bia uras en quei onn. Quei temps dalla midada ei stau in interessant e creativ temps per nus.

Cordial beinvegni ad Irena Blumenthal en nies team, ella ei dapi la fin digl onn responsabla per la partiziun d'affons.

Petronella Cavegn

